

He Whakatau

Me mātua pānui kia mārama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. Kua hū te puia. Kua heke te rangitoto ki hea? Pānuitia i roto i te pukapuka *Te Puia*.

He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te mōhio o te ākonga ki ngā puia me te rangitoto.

Matapakia ngā mahi ina hū tētahi puia. Kua kitea e te ākonga i roto i ētahi whakaahua, kiriata rānei?

Kōrerorerotia te āhua e horapa ana te rangitoto, e rere ana hoki i mua i te mātiao haere.

He Matapaki

Tirohia te pai o te pānui a te ākonga

I te wā o te matapaki, me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e mārama ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuatanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mihini ripene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. Ko te aha te kaupapa o te pukapuka?
2. Kua hū te puia, kua heke te rangitoto i te aha?
3. Kua rere te rangitoto ki hea?
4. He aha te rangitoto i tū ai i te taenga atu ki te moana?
5. Ki ōu whakaaro, he pēhea te nui me te kaha o te rangitoto?

Ngā whakautu ki ngā whakapuaki māramatanga

1. Ko te hū o tētahi puia me te rere o te rangitoto.
2. Kua heke i te maunga.
3. (Ki ngā rākau, ki ngā toka) ki te moana.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuatanga o te pukapuka nei.

Te pūtake

T He āhukahuka ki te papānga o te tāruatanga.

He whakatakinga ā-roro, he whakaharatau

I mua i te pānui i te pukapuka, kimihia ngā mōhiotanga o te ākonga ki ngā puia me te rangitoto. Matapakia te hū puia me te āhua e horapa ai, e rere ai hoki te rangitoto.

Kia oti i te ākonga te pukapuka te pānui, matapakia tō te kaituhi whakamahi tāruatanga ki te whakaahua i te horapa me te rere a te rangitoto. He aha te papānga o te tāruatanga ina pānuitia?

Titiro ki ngā kōrero pūrākau mō Ngātoroirangi, ā, mō te pakanga hoki o ngā maunga toa, o Tongariri mā.

Matapakia ētahi atu puia pēnei i a Tarawera (Aotearoa), i a Peleé (Ngā Inia ki te Uru), i a Mount St Helens (Te Hononga ki Amerika), i hea, i hea atu.